

## CARTEL DA CONSTRUCCIUN

Chantun ha publitgà  
cunvegns d'enclegientscha

Pervi d'ina pretaisa sin basa da la lescha da trasparenza ha il chantun Grischun stuì publitgar las cunvegns d'enclegientscha ch'el ha fatg ils onns 2019 e 2020 cun 15 interpresas da construcziun. Precedida a la publicaziun è in pingpong giuridic da bundant sis onns.

Las interpresas ch'han stipulà cun il chantun cunvegns d'enclegientscha eran involvidas en il cartel da construcziun ed avevan fatg cunvegns illegalas davart ils pretschs. La cumissiun da concorrenza da la Confederaziun (CUMCO) aveva perquai sancziunà las interpresas en diversas proceduras e mess en vista reducciuns da las multas sch'ellas fetschian pajaments da gulivaziun al chantun ed a las vischnancas donnegiadas tras las cunvegns davart ils pretschs.

En las tractativas cun 15 interpresas sancziunadas ha il chantun stipulà pajaments da 7 milliuns francs per el sez e da 2 milliuns francs per las 82 vischnancas pertutgadas.

## Process giuridic da bundant sis onns

In schurnalist da la televisiun svizra SRF aveva gia l'onn 2019 pretais la publicaziun da quellas cunvegns d'enclegientscha tranter il chantun e las interpresas sin basa da la lescha da trasparenza. L'administraziun chantunala ha refusà diversas giadas quella dumonda da publicaziun, il schurnalist ha fatg recurs cunter las diversas decisziuns en questa fatschenta fin avant il Tribunal federal.

En l'ultima decisziun ha il Tribunal superiur approvà il recurs dal schurnalist passa sis onns suenter l'emprima dumonda da publicaziun ed il chantun ha publitgà uss sias cunvegns d'enclegientscha cun las interpresas. Quellas cuntegnan l'import sin il qual las partidas èn sa cunvegns e la furmla, tenor quella l'import è vegnì calculà. Las tabellas detagliadas cun ils custs mess a quint da las interpresas al chantun ed a las vischnancas sun però censuradas en ils documents publitgads, medemamain ils nums dals represchentants da las interpresas che han sutscrit las cunvegns. (fmr/mst)

## CUIRA



L'entira scola populara da Cuira è stada ier da viadi per la Maiensässfahrt. FOTO OLIVIA AEBLI-ITEM/SOMEDIA

## «Mora isch schualfrei!»

Scolaras e scolars da Cuira han puspè montà lur chalzers da viandar e gizzà ils fists per las cervelats. Ier gievgia ha gi lieu la Maiensässfahrt. Quel di van tut ils uffants da la scola populara da la chapitala a viandar sin las differentas acias sur la citad. Quel grond viadi da scola datti gia dapi l'onn 1854 e tutga tar las tradiziuns da l'Unesco.

La damaun a las 6.55 èn quasi 2900 uffants partids da la citad veglia accompagnads da musica da marsch, sco che la citad da Cuira ha scrit en ina comunicaziun. La saira turnan ils uffants enavos a Cuira per il til tradiziunal tras la citad da Cuira che cumenza a las 19.00 al Martinsplatz. Quest onn èn ils uffants ids cun costumes tras giassas e vias da la chapitala grischuna, enramads da var 10'000 aspectaturas ed aspectatur. Il til finesch mintga onn sin la Quaderwiese, nua ch'i vegn chantà e regnì plets. La fin cloman tuts «Mora isch schualfrei!» e bittan lur chapels en l'aria. (cdm/fmr)

## DOMAT

## Accident da töf

Mesemna è in motociclist collidà a Domat cun l'ur dal passape. El è crudà e vegnì blessà mez grev, sco che la Polizia chantunala communitgescha la gievgia.

L'um da 40 onns era a las 22.10 sin la Via Innovativa en direzziun da la piazza da golf cura ch'el è crudà pervia da la colli-siun. Terzas persunas ed ils pumpiers han prestà emprim agid ed il Salvament da Cuira han transportà l'um en l'Ospital chantunala a Cuira. (cdm/fmr)

## ELECZIUNS 2026

«Jau hai anc adina plaschair  
da mia lavur»

Per il cusseglier guvernativ socialdemocratic Peter Peyer che recandidatescha per la terza perioda d'uffizi en la regenza, èsi essenzial che mintga abitanta ed abitant dal Grischun haja ina buna qualitad da viver. Quai ha el fatg da savair tranter auter a chascun da sia nominaziun avant in onn. Dapi l'onn 2019 maina Peter Peyer il Departament da giustia, segirezza e sanadad.

MARTIN GABRIEL/FMR

RG

Cun ina buna qualitad da viver per tuttas e tuts manegia Peter Peyer spazi d'abitar pajabel, bun provediment da sanadad, bunas colliaziuns da traffic e sustegn en cas da basegns. El saja conscient che quest giavisch na saja betg dal tuttafatg realisabel. Ma per el saja essenzial d'avair en mira questas valurs qualitativas. Peter Peyer ha cuntanschì en las ultimas elecziuns da la regenza dal 2022 il terz plaz cun passa 26'000 vuschs. Tenor la retschertga d'opiniuns da Sotomo dal matg 2026 tar 1500 persunas, cuntanschess Peter Peyer uss il quart plaz cun ina differenza da mo 1% sin Carmelia Maissen da l'Alleanza dal Center.

**FMR: Daco sto la partida socialdemocratica esser represchentada en la regenza grischuna?**

**Peter Peyer:** En la regenza na faschain nus betg politica da partida. Nus empruvain da chattar bunas soluziuns per noss chantun. Cler che nus discutain bleras giadas fitg intensivamain ed or da differentas opticas. Igl è relevant d'avair pliras vistas cun differentas valurs en la regenza. Ins vegn elegì en la regenza cun in satgados politic, ma en l'executi-va na datti nagina politica da partidas. La summa da tuttas valurs ed opiniuns è essenziala e perquai èsi giustifitgà che la partia socialdemocratica è era represchentada.

**Vus avais absolvi duas periodas da quatter onns sco schef dal Departament da giustia, segirezza e sanadad. Cun tge motivaziun candidais Vus per l'ultima perioda?**

Jau hai anc adina plaschair da mia lavur sco cusseglier guvernativ. Ed jau avess grond plaschair da cuntinuar en il Departament da giustia, segirezza e sanadad. Da restar en il medem departament porta stabilitad al team ed er al gremi da la regenza. Ultra da quai datti insaquantas tematicas en quest departament che jau terminass gugent.

**Tar Voss departament tutga tranter auter la sanadad publica e cunquai er ils ospitals dal Grischun. Ils davos onns han ils ospitals regiunals procurà per discussiuns e per lingias grossas en las medias. Tge è il problem?**

Jau vulesse be dir che l'impressiun ch'i giaja be mal cun noss ospitals regiunals cugliuna mintgatant. Per exempel: Ils problems en l'ospital regional a Samedan han dominà fitg en ils rapports da las medias. Ma en tut quest temp èsi era vegnì lavurà en favur da l'avegnir da l'ospital da Samedan.

**L'avegnir dals ospitals preoccupescha dentant blera glieud en noss chantun.**

L'avegnir dals ospitals è in tema en l'entira Svizra. E jau chapesch ils quitads da blera glieud. Noss pensum sco chantun è da mussar che nus vulain salvar noss ospitals en las regiuns, e quai cun in bun provediment da basa. En l'avegnir vegni a dar uschenunads models integrads, damai cun center e sut il tetg da quel en pliras instituziuns cun purschidas da sanadad. Percunter stuain nus ponderar da centralisar las prestaziuns che na vegnan betg duvradas avunda, pia da quellas che han bassas frequenzas en ils ospitals regiunals. In stretg connex cun la digren da las frequenzas ha la demografia futura ch'è fitg negativa en noss chantun. Da surmuntar quels obstachels è ina da nossas grondas sfidas dals proxims onns sin il sector da la sanadad publica.

**Co promovs Voss departament las forzas da lavur qualificadas en las instituziuns da la sanadad publica?**



Peter Peyer candidescha per la terza perioda d'uffizi sco cusseglier guvernativ. FOTO LIVIA MAUERHOFER

## Il terz socialdemocrat en la regenza grischuna

Suenter Claudio Lardi (1999–2010) e Martin Jäger (2011–2018) è Peter Peyer il terz cusseglier guvernativ socialdemocratic dal Grischun. Peter Peyer è naschì ils 17 da december 1965 ed è creschì si a Landquart. Suenter avair frequentà la scola media commerziala a Cuira ha el acquistà il 1989 il diplom da scolast da scolina a la Scola da dunnas dal Grischun (oz: Scola auta da pedagogia dal Grischun) a Cuira.

Suenter l'engaschament sco mussader a Domat, Turitg e Cuira e diversas autras activitads, ha Peter Peyer lavurà dal 2002 fin sia elecziun en il Cussegl guvernativ l'onn 2018 sco secretari dal sindicat tar la Federaziun dal personal dals servetschs publics VPOD e lura tar il sindicat dal personal da transport SEV a Cuira. Peter Peyer è vaiv e bab da duas figlias creschidas. El viva a Trin. Ses motto da la vita sa basa als plets da Karl Valentin: «Jau m'allegrel sch i plova, pertge sche jau m'allegrel betg, ploi tuttina.» (fmr/mg)

Recrutar avunda personal per ils servetschs da tgira n'è betg simpel. Quai che fa quitads a mai è la votaziun dals 14 da zercladur 2026 davart la limita da 10 milliuns persunas en Svizra. Jau crai ch'i vegniss per nus problematic da mantegnair il provediment da sanadad sche quella iniziativa vegniss acceptada. Surtut en las valladas dal sid ed era en l'ospital chantunala essan nus dependents da forzas da lavur da l'exteriur. A nus mancan las forzas da lavur giuvnas indigenas.

**La segunda part da Voss departament è la segirezza. Dacurt han ins legi per exempel en la revista 20 minutas dals commembers da la mafia en il Mesauc ch'èn vegnids arrestads. Ha il chantun Grischun sut controlla quest problem?**

Las persunas arrestadas en l'Italia ed en la Frantscha han ina permissiun da dimora tar nus en il Grischun, e quai tranter auter a Roveredo. La criminalitad organisada è deplorablain da chasa en l'entira Svizra. Per avair success cun arrestar ils malfatschents èsi impurtant ch'ils organs da polizia e d'inquisiziun transcunfinals, damai dals chantuns e dals pajais vischinants, collavureschian. Da l'autra vart mussa gist quest cas da Roveredo che nus en il Grischun stuain esser attents cura che persunas dumondan ina permissiun u cura ch'ellas avran u entschaivan in affar. Qua èn differentes uffizis chantunals e las vischnancas participadas. En l'avegnir stuain nus procurar che tut ils acturs da differentes departaments chantunals, vischnancas e la Confederaziun collavureschian meglier.

**Partent dal fatg che Vus vegniss reelegi ils 14 da zercladur 2026 – co vai enavant per Vus en la terza perioda d'uffizi?**

Sche jau vegn reelegi dependi schebain la regenza nova è d'accord che jau cuntinuesch en mes departament da fin qua. La sanadad publica vegn ad esser in grond tema ils proxims quatter onns. Ussa avain nus gist preschentà il

maletg directiv chantunala da sanadad. A quest maletg directiv suonda la planisaziun dals ospitals per ils proxims onns. Quai vegn ad esser in grond pensum. L'autra gronda incumbensa è la giustia dal Grischun. Il Cussegl grond vegn a tractar ina ulteriura refurma da las dretgiras cun ina eventuala organisaziun nova da las dretgiras regiunals. Sco cusseglier guvernativ en il gremi da la regenza èsi da viver cun ils temps instabils sin l'entir mund. Era il Grischun vegn a sentir las consequenzas da quella instabilitad. I vala d'esser preparà.

## Sardegna, mangiar bain e Trin

Curt e sec respunda mintga candidata u candidat per la regenza a tschintg dumondas da la FMR.

**Pertge abitais Vus gist a Trin?**

Perquai ch'igl è là il pli bel.

**Tgenina è Vossa bavronda preferida?**

Quai dependa dals «fatgs secundars». Ma l'emprim espresso la damaun è insatge dal meglier.

**Tge luxus sa lubis Vus?**

Bun da mangiar.

**Datti insatge extraordinari en Vossa chasa?**

Gea, i dat en mintga entgarna fitg bleras e bellas regurdientschas.

**Nua passentais Vus per il solit Vossas vacanzas?**

En Sardegna.